

Ivo Valdes, OPPA: “Mi ta haya jammer cu nan ta pronk cu un ouderen zaken of un ouderen raad y nos mes nos sa di nada”

Recientemente minister demisionario di Asuntonan di Adulto Mayor, Ursell Arends, anuncia e realisacion di e Raad voor Ouderen (RAVO) cu tin como meta stimula participacion di adultonan mayor den comunidad. No ta conoci ken ta forma parti di e raad aki, pero un organisacion cu sorprendentemente no ta forma di dje ta e Organizacion di Pensionado Publico di Aruba (OPPA), asina e presidente di e organisacion a informa na Bon Dia Aruba.

Durante un entrevista cu Bon Dia Aruba, Sr. Ivo Valdes, presidente di OPPA, a informa cu OPPA no ta forma parti di e raad aki ni tampoco tabata al tanto di e realisacion di e Raad voor Ouderen.

Valdes a splica cu OPPA ta e motor tras di e peticion pa bin cu un Raad voor Ouderen for di 2017 caba, desde e prome Gabinete Wever-Croes. Durante tur e tempo ey nan a haci trabou y entrega documento pa bin cu e Raad voor Ouderen.

El a sigui splica cu tres pa cuater siman pasa e tabata den reunion cu prome minister demisionario, Evelyn Wever-Croes y a puntra tocante e Raad voor Ouderen, na cual e mandatario a contesta Sr. Valdes cu e lo bay check unda e proceso ta pega.

Valdes a indica cu OPPA a skirbi carta pa su Excelencia Gobernador di Aruba y pa Secretario di Estado, locual el a bisa no a cay mucho den bon tera. Recientemente e organisacion a manda un otro carta pa gobernador relaciona cu e ultimo sucesonan den Parlamento, locual tambe el a indica a cay den mal tera. “Pero mi trabou mi ta haciendo,” el a remarca.

Un hecho cu Valdes a enfatisa no ta bon ta cu como e representantenan di adultonan mayor, OPPA no sa di nada y no sa ken ta den e raad aki tampoco, “y esey mi ta haya un falta di respet pa nos organisacion,” el a destaca.

El a sigui splica cu prome e mandatario encarga cu asuntonan di adulto mayor a forma e Ouderen Zaken y a haci Sra. Desiree Helder director di esaki y segun el a indica, nan no tabata sa nada tampoco.



“Mi ta puntra ta ki manera di traha esey ta. Nos cu ta asina cerca di e grandinan, nos cu semper ta sali na vanguardia di e grandinan nos mes no ta wordo poni na altura door di minister di asuntonan di adulto mayor y esey mi ta haya falta di respet pa nos organisacion. Mi ta haya jammer cu nan ta pronk cu un ouderen zaken of un ouderen raad y nos mes nos sa di nada,” el a subraya.

Algo cu a molestia Valdes tocante e anuncio di Raad van Ouderen ta e hecho cu e potret cu a ser usa hunto cu e anuncio cu gobierno a manda ta un potret bieu, segun el a indica. El a splica cu den e potret berdad bo ta wak e y algun otro persona, pero ta trata di un potret di un comision cu a ser forma aña pasa pa con nan ta haci cu e situacion cu tabatin entre SABA y minister di Asuntonan di Adulto Mayor. E potret tabata di un reunion cu a tuma luga tocante e situacion ey y no ta algo cu a sucede recien.

“P’esey mi a haya straño cu e potret ey ta wordo publica como si fuera cu e hendenan ey ta e integrantenan di Raad voor Ouderen, pero esey no ta berdad,” el a agrega.

Valdes a subraya cu na Aruba tin hopi cosnan ta pasa y ora cu un persona reacciona riba situacionnan asina, nan ta ser critica di mal forma. “Mi no ta compronde e mentalidad di hendenan ki riba,” el a resalta.

“Mi ta sigui haci mi trabou y mi ta spera cu nos lo wordo yama pa forma parti di e Ouderen Raad pasobra no por tin un Ouderen Raad sin un hende grandi pa representa nan den e Raad ey,” el a enfatisa.

Pa loke ta prioridadnan di OPPA pa e proximo periodo di gobernacion, tin algun tema cu segun e organisacion e gobierno nobo mester atende cu urgencia. OPPA ta convenci cu e gobierno eligi lo tin hopi desafío pa atende cu urgencia y

a prepara un lista di prioridad cu diferente tema.

Un di e temanan principal ta costo di bida. OPPA ta pidi atencion inmediato riba inflacion y aumento di costo di bida. E organisacion ta solicita pa busca un manera pa estabilisa e prijsnan di comestibel, energia y otro gastonan basico pa alivia e presion ariba ciudadanonan.

OPPA ta pidi tambe pa reactiva economia na un manera sostenible. E organisacion ta resalta cu diversificacion ta esencial, cu enfoka riba sectornan cu no ta depende tanto di turismo, manera tecnologia, agricultura y emprendimento local.

Otro tema importante cu OPPA ta pidi atencion urgente p’e ta AZV y cuido medico. E organisacion ta subraya cu e situacion di AZV ta hopi preocupante y ta remarca cu e gobierno nobo mester reforsa e sistema pa garantisa un balans optimal entre sostenibilidad fi-

nanciero y acceso na salud di calidad pa tur hende.

Maneho di e dump tambe ta punto di importancia. OPPA ta remarca cu e problema di “waste management” ta un prioridad y ta indica cu un solucion sostenibel pa e landfill ta urgente pa proteha e medio ambiente y salud publico.

E situacion di e planta di RWZI tambe ta un tema primordial pa e organisacion. Nan ta indica cu e sistema di tratamiento di awa preto mester un expansion y mehoracion urgente pa por maneha e cantidad di awa di desecho relaciona cu e construccion masivo di hotelnan y expansion turistico.

Otro tema di importancia pa OPPA ta trata e pensionado y bienestar social. E organisacion ta pidi pa e gobierno nobo garantisa cu e sector di pensionadonan no ta keda atras. Den esaki, nan ta remarca, mehoracion di e sistema di pension y cuido pa nos mayornan ta hopi necesario pa duna nan un bida digno.

E organisacion a trece dilanti cu durante e ultimo cuater aña un cantidad di pensionado a muri y no ta haci ningun investigacion. Segun DVG y AZV, e cantidad di morto ta normal, pasobra e cantidad di pensionado ta halto na Aruba.

E cantidad di morto di e pensionadonan durante e siguiente añanan tabata: 2020, 665 pensionado; 2021, 803 pensionado; 2022, 766 pensionado y 2023, 703 pensionado.

Un punto cu OPPA tambe ta pidi atencion p’e ta educacion. Nan ta resalta cu inversion continuo den educacion, incluyendo atencion riba e calidad di enseñansa y bienestar di e maestro y e estudiante ta importante.

E organisacion ta trece dilanti tambe e tema di infraestructura. Nan ta subraya cu mehoracion di infraestructura publico, incluyendo caminda, transporte publico y mantencion di e edificacionan di gobierno ta importante pa garantisa un ambiente sigur y funcional pa tur.

“Nos ta di opinion cu e gobierno nobo mester atende cu e temanan aki cu urgencia pa por trece estabilidad y progreso pa nos isla,” e organisacion ta enfatisa.

